

(NAQQIUT)

Inatsisartut Suleriaasianni § 33 naapertorlugu aalajangiiffigisassatut siunnersuut manna Suleriaatsimut Ataatsimiititaliap matumuuna saqqummiuppaa:

Inatsisartut ataatsimiittarfissaannik, allaffissornikkut sullissiviit ilanngullugit, nutaamik sananissamik 2013-imi novembarimi tunngaviusumik isummernerup Inatsisartunit ilalerneqarnissaanik Inatsisartut aalajangiiffigisassaattut siunnersuut.

(Suleriaatsimut Ataatsimiititaliaq)

Tunngavilersuut:

2013-imi ukiakkut ataatsimiinnermi Suleriaatsimut Ataatsimiititaliami aalajangerneq tunngavigalugu Siulittaasoqarfik Inatsisartunut aalajangiiffigisassatut siunnersuuteqarpoq Inatsisartoqarfissamik nutaamik sananissamut pilersaarutit naammassillugit suliarineqarnissaannut, taamatullu aamma siunnersuummi suliasamat aningaasatigullu killiliussat allaaserineqartut iluanni sananissaq pillugu pisariaqartunik isumaqatigiissuteqarnissamut tunngaviusumik aalajangernissamik siulittaasoqarfiullu tamatumunnga piginnaatinneqarnissaanik.

Aalajangiiffigisassatut siunnersuut ilaasortanit 24-nit amerlanerussuteqartunit akuerineqarpoq.

2013-imi siunnersuummik Inatsisartut suliarinninnerat ilaliinerallu sioqqullugu suliasaq pillugu aalajangiinissamut paasissutissatullu atortussanik sukumiisumik suliarineqarsimasunik saqqummiisoqarpoq, soorlu aamma suliasaq Suleriaatsimut Ataatsimiititaliami sukumiisumik suliarineqarsimasoq.

Taamaalilluni Inatsisartoqarfissamik nutaamik sananissamik Inatsisartut aalajangiinnerat timitalerniarlugu Siulittaasoqarfiup sulinera ingerlaannarpoq 2015-ip aasaanera tikillugu.

Suleriaatsimut Ataatsimiititaliap 2015-imi juunimi ataatsimiinnermini suliap killiffia oqallisigaa. Ataatsimiinnermini ataatsimiititaliap aalajangerpaa suliaq unitsinneqassasoq siulittaasoqarfimmi suliasamat amerlanerussuteqartut tapersersuinerata allannguuteqarnera pisutigalugu. Tamanna aamma tusagassiorfinnut nalunaaruteqarnikkut ilisimatitsissutigineqarpoq.

Siulittaasoqarfiup tamatuma kingorna 2016-imi apriliimi suliasaq Suleriaatsimut Ataatsimiititaliamut oqallisigisassanngortippaa, suliniutip siunissaa pillugu Inatsisartut tamarmiusut inaarutaasumik aalajangiinissaannik qinnuigineqarnissaat inassutigalugu.

Suleriaatsimut Ataatsimiititaliap 18. april 2016 ataatsimiinnermini aalajangerpaa UPA16-imi suliap killiffia Inatsisartunut tamarmiusunut saqqummiunneqassasoq suliap ingerlaqqinnissaata oqallisigineqarnissaa siunertaralugu.

Nutaamik Inatsisartoqarfiliornissaq pillugu sukumiisunik nalunaarusiortoqartareerpoq, soorlu aamma suliniut sulii Sanaartugassanut Iluarsagassanullu Aningaasaateqarfimmi inissisimasoq. Sanaartorfissamik aalajangersimasumik sulii nassaartoqanngilaq, siulittaasoqarfili sanaartorfiusinnaasumik nutaamik ujarlerneq ingerlateqqissappagu suliniutip siunissaa pillugu Inatsi-sartut erseqqissumik aalajangernissaat pisariaqarpoq.

Suleriaatsimut Ataatsimiititaliap nalunngilaa tamatumani partiit tamarmik naalackersuinikkut akunnattoorfeqarsinnaammata. Tamattali isumaqatigiissutigisinnaagunarparput Inatsisartuni sulinermut avatangiisitigut atugassarititaasut ullutsinnut naleqqukkunnaarsimmata, nutarterisoqartillugu oqartoqarsinnaalluni iikkat nuuginnarneqartartut tunngaviusumik pissutsit iluarsisariaqartut allanngortinnagit. Aamma avaqqunneqarsinnaanngilaq Inatsisartut piujuartussaammata. Inatsisartut aamma ukiut 100-t qaangiuppata maaniissapput. Ullumikkut qinikkat kisiisa eqqarsaatiginagit siunissami qinigaasartussat aamma eqqarsaatigalugit Inatsisar-toqarnerput nutartertuassagutsigu ineriartortittuassagutsigulu ullumikkut sulinermut killissarititaasut ineriartortinnissaannut sapiissuseqarlunilu piumassuseqartoqartariaqarpoq.

Sanaartukkap Nuummi Naalackersuisut allaffeqarfiinut illorsualiaasimasup sananeqarneranisut aningaasalersorneqarnissaa eqqarsaatigineqarpoq, tassa pisortat namminersortullu peqatigiinnerisigut BOT-mik (Build, Operate and Transfer – Sanaartoriarlugu, Ingerlateriarlugu Tunniullugu) taaneqartartumik. Taamaalilluni Illuut A/S tassaassaaq Inatsisartoqarfissap sananeqarnissaanut pigisanik aalaakkaasunik qularnaveeqqusiussilluni taarsigassarsisussaq sanaartornermillu isumaginnittussaq, tamatumalu kingorna Inatsisartut sanaartugaq Illuut A/S-imit ukiuni 30-ni atorunnaarsinneqarsinnaanngitsumik attartussallugu.

Attartornermi taamaallaat akilernerqartassapput pigisanik aalaakkaasunik qularnaveeqqusiussilluni taarsigassarsianut akiliutinut tamatumunngalu atatillugu akissaajaatinut aningaasartuutit. Taamaalilluni Illuut A/S immikkut isertitaqartartussaassanngilaq. Inatsisartoqarfik ukiut 30-it qaangiuppata akeqanngitsumik Inatsisartunut tunniunneqassaaq. Taamaalilluni sanaartorneq 2017-imi IST-mut (tassa Ingerlatsinermit, Sanaartornermut Taarsigassarsisitsisarnermullu missingersuutinut) sunniuteqassanngilaq. Illuut A/S-ip pigisanik qularnaveeqqusiilluni taarsigassarsineranut atatillugu inuiaqatigiit ataatsimut isigalugit ilanngaatisat ilanngaatigereerlugit akiitsui sanaartornermut atatillugu taarsigassarsiat nalinginik anner-tuseriassapput.

Sanaartukkap atorneqalernerani attartornermut ingerlatsinermullu aningaasartuutit Aningaasanut inatsimmi konto pingaarnaq 20.30.10 Illuutininq ingerlatsineq aserfallatsaaliuinerlu imaluunniit taamaaqataanik Inatsisartut suliaasaqarfiisa ataanni konto pingaarnaq siunertamut pilersinneqarsimasoq aqutugalugu aningaasartuutigineqartassapput. Sanaartukkamut 3.500 kvadratmeterinik annertutigisumut ukiumut attartornermut aningaasartuutit 10,5 mio. kr. aamma 12,5 mio. kr. akornanniinnissaat naatsorsuutigineqarpoq, sanaartorneranut aki, ator-tulersuutit, pequtsersuutit il.il. apeqqutaallutik. Suliniummut atatillugu ilanngaatisat ilan-

ngaa-tigereerlugit ukiumut ingerlatsinermut aningaasartuutinit apeqqutaassaaq illorsuaq ul-lumikkut Inatsisartunit atorneqartoq Inatsisartoqarfittaaq atuleriarpat qanoq pineqassanersoq.

Taamaalilluni aningaasalersueriaatsikkut siunnersuutigineqartukkut siunissami qinigaasartus-sat sullivissaannik sanaartorneq, suliniutinit allanit pisortanit aningaasalersorneqartunit ani-ngaasaliissutinik tigusingikkaluarluni ingerlanneqassaaq.

Suliniut atorfissaqartinneqarpoq pisariaqartinneqarluni, tamanut iluaqu-taasunik nuannaaru-taasumillu siunissami qinigaasartussat suliffissaqarnissaat qularnaarneqassappat.

Naggataatigut ilanngussat ilanngunneqartut innersuussutigissavakka.

Taamatut oqaaseqarlunga siunnersuut Inatsisartunut oqaluuserisassanngortippara.

Ilanngussat:

- A. Siulittaasoqarfimmut allakkiaq 6. juni 2013-imeersoq.
- B. Partiinut tusarniaassut 22. juni 2013-imeersoq akissutillu tiguneqartut.
- C. Siulittaasoqarfimmut allakkiaq 10. august 2013-imeersoq.
- D. Siulittaasoqarfimmut allakkiaq 8. oktober 2013-imeersoq.
- E. UKA2013/20-mut isumaliutissiissut
- F. Inatsisartoqarfissat nutaaq 26. marts 2015-imeersoq